



職方典第一千二百九十四卷

郴州部藝文二

詩詞

入郴江

隋薛道衡

丈節遵巖會揚舲泝急流
征塗非白馬水勢類黃牛
跳波鳴石磧濺沫擁沙洲
岸迴槎倒轉灘長船却浮
緣崖頻斷挽挂壁屢移鉤
還憶青絲騎東方來上頭

謫驩州過郴江口

唐沈佺期

少曾讀仙史知有蘇耽君
流放來南國依然會昔聞
泊舟問耆老遙指孤山雲
孤山郴郡北云爾昇天晏
不才予竄迹羽化子遺芬
將覺成仙史旋驚禦寇文
此中迷出處含思獨氛氤

送李少府貶郴州

王維

明到衡山與洞庭若爲秋月聽猿聲
愁看北渚三湘遠惡說南風五兩輕
青草瘴時過夏口白頭浪裏出湓城
長沙不久留才子賈誼何須弔屈平

出郴山口至疊石灣野人室中寄張十一

王昌齡

櫺柵無冬春柯葉連峯稠陰壁下蒼黑烟含青江樓景開獨泐曳響苔隨興酬旦夕望吾友如何迅
孤舟疊沙積爲岡崩剝雨露幽石脉盡橫互潛潭何時流既見萬古色頗盡一物由永與世人違氣
還草木收盈縮理無餘今往何必憂郴土群山高耆老如中州孰云議舛降豈是娛宦遊陰火昔所
伏丹砂將爾謀昨臨蘇耽井復向衡陽求同疚來相依脫身當有籌數月乃離居風湍成阻修野人
善竹器童子能谿謳寒月波蕩漾羈瀉去悠悠

奉送二十三舅錄事崔偉之攝郴州

杜甫

賢良歸盛族吾舅盡知名徐庶高交友劉牢出外甥泥塗豈球玉環堵但柴荆衰老悲人世驅馳厭
甲兵氣春江上別淚血渭陽情丹鷁排風影林鳥反哺聲永嘉多北至勾漏且南征不見公侯復終
聞盜賊平郴州頗涼冷橘井尚淒清從役何蠻貊居官志在行

橘井

元結

靈橘無根井有泉世間如夢又千年鄉關不見重歸鶴姓字今爲第幾仙

逢郴使寄鄭協律

劉長卿

相思楚天外夢寐楚猿吟更落淮南葉難爲江上心衡陽問人遠湘水向君深欲逐孤帆去茫茫何處尋

送李侍御貶郴州

前人

洞庭波渺渺君去弔靈均幾路三湘水全家萬里人聽猿明月夜看柳故年春憶想汀洲畔傷心向白蘋

洞庭驛逢郴州使還寄李湯司馬

前人

洞庭秋水闊南望過衡峯遠客瀟湘裏歸人何處逢孤雲飛不定落葉去無蹤莫使滄浪叟長歌笑爾容

寄宜章孫氏

韓子倉

戎馬縱橫未說歸草間梁上昔餘威布帆此去應無恙銀盃從來亦解飛世事只堪開口笑主人空有食言肥自慚學道工夫了坐覺文章到眼稀

代李員外郴州女郎廟祈雨

韓愈

乞雨女郎魂。魚羞潔且繁。廟開鼯鼠叫。神降越巫言。早氣期銷蕩。陰宮想駿奔。行看五馬入。蕭颯已隨軒。

贈郴州張侍御史詩二首

前人

休垂絕徼千行淚。共泛清湘一葉舟。今日嶺猿兼越鳥。可憐同聽不知愁。
山作劍攢江瀉鏡。扁舟斗轉疾於飛。迴頭笑向張公子。終日思歸此日歸。

郴口贈張十一功曹

前人

雪颭霜翻。看不分。雷驚電激。語難聞。沿涯宛轉。到深處。何限青天無片雲。

奉和楊尚書郴州追和故李中書夏日登北樓十韻之作

柳宗元

郡樓有遺唱。新和敵南金。境以道情得人期。幽夢尋層軒。隔炎暑。迴野恣窺臨。鳳去徽音續。芝焚芳意深。遊鱗出陷浦。唳鶴遶仙岑。風起三湘浪。雲生萬里陰。宏規齊德宇。麗藻競詞林。靜契分憂術。閑同遲客心。驂騑當遠步。題跋莫相侵。今日登高處。還聞梁甫吟。

植靈壽木

前人

白華鑒寒水怡我適野情前趨問長老重復欣嘉名蹇連易衰朽方剛謝經營敢期齒杖賜聊且移
孤莖叢夢中競秀分房外舒英柔條乍反植勁節常對生循玩足忘疲稍覺步武輕安能事剪伐特
用資徒行

送嚴大夫之郴

張籍

旌旆過湘潭幽奇得遍探莎城百粵北行路九疑南有地多生桂無時不養蠶聽歌難辨曲風俗自
相諳

石園山

李羣玉

前山帶秋色獨住秋江晚疊嶂入雲多孤峯去人遠黃緣不可到蒼翠空在眼渡口問漁家桃源路
深淺

詠郴州溫泉

宋張舜民

峇嶢華清宮下有溫泉水繡嶺絡千門玉蓮噴九蕊第一名御泉第二沐妃子從上傍諸王最下列
衛士淙淙三十六枝分或櫛比每年十月初仙仗常依此樓頭羯鼓停殿上霓裳委塵垢三百年行

古今圖書集成
人與閭里忽驚榔嶺下和煖雅相似祇是遠長安不當人眼底皇天宅萬物得地卽爲美幸免與興亡往來常止止

香山勸農

丁逢

宿雲留潤欲侵衣草長山腰路濺泥映屋畫圖花遠近接畦湍瀨水高低人趨南畝天涯樂春入東菑土脈齊寄語老農還自笑近來辛苦慣扶犁

東山

前人

水繞山圍夏木蒼舊時賢相讀書堂窗間遠岫供吟徧來倚闌干伴月涼

藏春亭

阮閱

萬紫千紅一徑深臙脂爲地粉爲林有人來問春何在向道花間無處尋

迷穴

前人

兔葵燕麥撼春風廢址頽垣古縣封聚落已遷江上去隔林依舊兩三峯

高亭

前人

蒼苔黃葉滿閒庭門對南山數點青過客不知興廢事猶言縣宇是高亭

獨秀峯

前人

瘴山蠻嶺闕嵯峨上可攀躋下可磨萬岫千山皆闕茸一峯獨秀不須多

龍泉

元王都中

一泓寒水碧泠泠四面青山列翠屏龍臥深潛魚自樂遶塘風送稻花馨

桂陽外沙竹園書屋歌

明李東陽

桂陽縣南多竹園朱家種竹秀且蕃根如蟠龍葉翥鳳側立聳拔皆兒孫千枝萬幹散復合上蔽倒
景迴清曠碧雲在空晴不捲霜雪掃地寒無痕南池水清綠於染影帶晴江春冉冉中林斷處忽青
山門外筆峯秋數點竹園老翁長愛詩讀書教子鬢成絲臺驂郡駕日相逐澗雨岩風無改時漢家
中丞霜雪姿南歷嶺海西幽岐十年襟抱畫圖見萬里平安書札知秋曹郎官清比竹身著青袍佩
蒼玉竹林在園書在屋如此傳家殊不俗君家雖貧貧亦足有園可居書可讀我家湖南在鄉曲無
竹無園但空谷歸當坐我青石牀淨洗胷中塵萬斛

再入梵安寺

李廷東

兩入梵安寺
霏談浩莫涯
松陰歸倦鶴
池草入鳴蛙
客厭空山雨
僧烹近午茶
蕭然淹世味
何事更乘槎

經廣教廢寺

前人

廣教過斜日
經臺靡子存
陰雲蒸野水
衰草結荒村
有鳥能啼樹
無僧可與論
江寒煙暝合
漁笛自黃昏

贈郴州范君山

何景明

桂陽之山石巖巖
四時雲氣流
杉松江開秀色蟠
三楚天削芙蓉羅
七峯翩翩烟霧下
鳳鸞往往霹靂隨
蛟龍鍾奇產異理
亦有黃金丹砂共
瓊玖
何況人傑應地靈
碩士名儒出先後
君山燕泉各一時
晚逢范君亦其偶
范君古貌更好古
爲問君山乃其祖
學海遙聞前輩風
辭場獨覺良工苦
君爲進士宰江縣
頗厭簿書耽筆硯
神龍未應困泥滓
驂騑會自追風電
君山十年不相見
見君如見君山面
燕京四月花滿甸
邂逅不得同遊宴
花間送爾雙鳬翔
廬山高橫玉梁雲
停鴈過一回首月

明琴靜誰舉觴我自辭家來帝鄉宿賓舊友稀登堂悵望南道思桂陽感今道故增悲傷

燕泉

魯鐸

山堂古書帶新注時時傳向人間去山中有水名燕泉護繞山人著書處堂前洗硯動廻塘墨瀋涓涓欲濫觴積流到海變海色河伯天吳驚大方山人爲霖躡臺省手挹芝瓢入蒼冥槁枯萎爾足沾濡困渴沉疴快涼冷忽接泉頭書滿架蓮開魚泳近橫槎眼前用世功已就鏡裏流年鬢未華試問登崇何歲月童年文擊南宮節今古勳庸校蚤遲燕泉大與礪溪別

蘇仙嶺

周南

直上山上海欲竭山上白雲掃不得一簾松影掃風清幾杵鐘聲敲月白煖爐煉他元道丹寒泉洗我心頭熱三百甲子我當歸莫把歸期空自說

弔獅子石

曾全

獅子石砥中流苔斑其色玉白其頭呀然鼻口奇突兀疑是老人星隕石借問昔年來州守官曹折閱伊誰咎漫將斧鑿碎唇牙石不能言俯其首寃哉石誰爲傷時乎時乎亦靡常何不在陰晴宜都

郡又不在甲乙牛奇章或慶雲生萬狀或松風薦微涼或醉倚柴桑里或醒步平泉莊或悞飲熊渠羽或血濺秦鞭殃於戲石乎人生冤抑自今古區區一石何足數君不見汨羅江水汨流深東門抉目亦而汝我是山中人飢將白石煮漱流枕石二十年癖在膏肓孰可愈弔爾石石自諉我有釣船長繫此白鷗黃鶴相因依我醉我眠聊汝爾穀城山下不須期正值拂衣歸洞時明月清風分我席坐對青山忘世機

蘇仙觀

前人

百尺樓臺千仞山縈紆石磴踏仙關白雲常宿疎櫺外明月平飛碧樹間鹿傍竹根眠獨穩鶴巢松頂夢應聞潘園尙有遺蹤在綠韭春風繡石灣

太平寺

前人

招提依縣郭卓錫自何年境寂花飛雨堂空月照禪隨風清磬遠曷霧異香偏坐久雲生袂真疑謝世緣

太平寺

二首

羅明

一徑入禪室空門絕世紛捲簾看竹雪掛袖染松雲碑古龍紋暗峯高鷺影分老僧心了了釋話當
論文 古木映疎篁垂陰鎖殿廊露吟山佩冷雲臥石牀涼貝葉翻春綠曇花散晚香楞嚴應誦罷
心跡兩相忘 重來遊寶地掃壁漫吟詩樹暗雲歸早山高月上遲松搖栖鶴夢鉢洗化龍池試問
無生法嘻嘻笑不知

蘇仙嶺 一首

前人

行盡谿山更上山白雲深處是仙關望中吳楚乾坤大坐底松喬日月閒岩草翠搖鸚鵡綠澗花紅
染鷓鴣斑登臨未了殘詩句付與烟莎霧柳間 金碧樓臺倚半空松花不掃白雲封紫綃製磬煙
霞色斑筭裁冠珖瑁容龍甲捲來天外雨鶴翎梳破樹頭風世人若問長生訣洞口桃花幾度紅

卜築何公山

何孟春

何公山好世爭傳著我茅齋得幾椽業主敢從今日定山名如結再生緣天教避俗非真隱人解離
群是散仙勝跡可容成不朽戴生能折券頭錢

觀音巖

胡漢

虛巖斜傍楚江湄把酒登臨事事奇
秋浪捲空飛白雪曉煙籠石起青螭
微微花氣侵簾入隱隱鐘聲隔岸隨
仙境不緣符客改維舟鎮日費詩脾

八面山二首

陳言

仗節平臨虎豹關旌旗搖曳萬重山
誰云八面能誇敵自信千夫迴莫攀
跨鶴影分霄漢外鳴騶聲落翠微間
生平客況憑高興獨立峯頭爲破顏
入楚貪山幾倦勞登臨纔覺此山高
漫愁蹇足心還怯更笑狂標氣轉豪
撫劍光芒侵斗極振衣風韻薄松澗
何當結屋千層上俯視塵寰一羽毛

君子亭

謝邦信

濂溪亭子涼如水綠酒青山愜北遊
海內衣冠憐此夜天涯羈旅怕逢秋
少陵自是金門客公瑾還應萬里侯
近得西鄰添二仲思鄉同倚鎮南樓

艮巖

前人

越聲知故國斗酒憶高陽逐客今三
始窮途且五將浮雲心仰切流水意
何長窈窕諸天遠歲華雙樹涼花香
滿天地草色上衣裳不謂憂黔首雲
巖與世忘

蘇仙觀

李永敷

參差樓閣俯羣山訪勝重來曉扣關望遠眼回三楚外吟懷清絕萬松間瑤壇地迴烟霞近石洞雲深歲月閒淹坐不知歸棹晚數聲漁唱起江灣

問仙洞

前人

野興撩人轉覺繁問仙落日更移樽寒江衝綠迴魚艇野岫分青到石門宿鳥已看爭覓樹遊人却笑尙尋源新詞歌徹杯傾倒歸去林梢月一痕

觀音巖

譚文獻

石磴縈紆掛壁間詩情常自愛躋攀花融淑氣香隨屨草拂東風綠染山望裏鳥飛晴樹迴坐中魚戲碧流閒乘風醉舞春衫薄小艇歸來月一灣

觀音巖

曾獻瑞

山骨斲成訝化工天然樓閣快玲瓏松垂峭壁空林碧日映香臺篆影紅載酒客遊圖畫裏敲詩人坐玉壺中登樓莫惜馳眸遠望斷南來幾度鴻

良巖龍隱

楊本厚

巖泉滴瀝石嶙峋松舍清幽竹四鄰源噴佛崖寒夏日龍藏仙洞臥朝雲當簾樹影侵禪杖到楊林
聲掃俗塵賦景賞懷花共笑更看幽澗躍潛鱗

潘園仙韭

李盛皐

香風嘶馬出林垌仙客長冥韭自青春盡平蕪人不翦空餘翠色在沙汀

森口客舟

彭夢翼

水自潺湲山自青荒涼古廟蕭陰陰老僧莫發黃昏磬敲動孤舟萬里心

金紫巖

馬文

仙人竹杖化爲龍騎上巖頭金紫封丹竈無烟曾煮石青都有鶴尙巢松清新碧眼浮嵐氣牢落塵
心靜午鐘堪嘆百年成底事殘雲幾點過前峯

遊蒙巖

前人

路入仙宮半日留尋源渾似武陵遊鶴巢松老雲岩暖泉噴花香玉井幽芝草每依奇石秀元猿時

向茂林投爐烟飄渺南窗下閒借黃庭一校讎

遊良巖

前人

禪關金地自逍遙石路無塵隔市囂白鹿鳴時瑤草綠青鸞栖處碧桃嬌水縈羅帶清堪掬峯疊烟鬟翠可描怪底田家懼未足夜來甘雨灑天瓢

太清漁棹

朱英

沙汀蘆渚歲悠悠畫槳蘭橈日放舟烟雨一蓑江月曉星霜幾棹水天秋得魚自酌開家醞罷釣閒眠伴海鷗身世驚驚心太古肯關塵世半分愁

東隴春耕

前人

和風送暖艷陽天載事京疇曉不眠好雨初晴雲滿笠耕犁新課竹爲鞭閒隨短笛春堤外偶答村歌夕照邊賦薄徭輕官不擾鼓聲時聽祝豐年

雲蓋仙林

李瑞

砢砢孤撐一徑通仙臺縹緲翠微中蓬壺冷浸三秋月石洞虛涵五夜風町疇鹿場芳草合離披丹

鼎曉雲籠不知前日朝元客曾到雲關第幾重

東江古渡

前人

銀潢一瀉遶東流野色微茫古渡頭茅店雞聲人度月霞天漁唱柳橫舟
片帆烟雨搖千古兩岸鶯花伴幾秋何日臨流沽一醉西風長笛倚江樓

大官夕照

邊貢

僻署閒無事西山看落暉孤烟籠樹出倦鳥帶雲歸
碧岫銜紅影丹霞扶翠微桑榆留好景晚節願無違

蘇山春色

前人

東嶺仙人跡韶光每愛看流鶯啼綺樹走馬耀銀鞍
酒向花前醉琴宜竹裏彈明朝簿書暇且作勸農官

古寺禪鐘

前人

化城猶咫尺風送梵聲遙拙吏懷三徑殘僧記六朝
洪音傳震旦警夢入清宵視息齋居久還憑破